


佛所行讚經

卷一
之三

典


三一



ASIAN NATIONAL
ORIENTAL
COLLECTION



4703



佛所行讚經卷第十

馬鳴菩薩撰

北涼天竺三藏曇無讖譯

生品第一

甘蔗之苗囊 釋迦無勝王 淨財德純備

名故曰淨飯 羣生樂瞻仰 猶如初生月

王如天帝釋 夫人猶舍脂 執志安如地

心淨若蓮華 假譬名摩耶 其實無倫比

於彼象天后 降神而處胎 母悉離憂患

不生幻偽心 厭惡諠譁俗 樂處空閑林



吳興善堂藏

佛所行讚經卷第十

生品第一

藍毘尼勝園 流泉華果茂 寂靜樂禪思

啓王請遊彼 王知其志願 而生奇特想

勅内外眷屬 俱詣彼園林 爾時摩耶后

自知產時至 偃寢安勝牀 百千姝女侍

於四月八日 時和氣調適 齋戒修淨德

菩薩右脇生 大悲救世間 不令母苦惱

優留王股生 卑偷王手生 曼陀王頂生

伽叉王腋生 菩薩亦如是 誕從右脇生

漸漸從胎出 光明普照耀 如從虛空墮

不由於生門 修德無量劫 自知生不亂

安諦不傾動 明顯妙端嚴 晃然從胎現

猶如日初昇 觀察極明耀 而不害眼根

縱視而不耀 如觀空中月 自身光照耀

如日奪燈明 菩薩真金身 普照亦如是

正直心不亂 安詳行七步 足下安平趾

炳徹猶七星 獸王師子步 觀察於四方

通達真實義 堪能如是說 此生爲佛生

則爲後邊生 我唯此一生 當度於一切

應時虛空中 淨水雙流下 一温一清涼

灌頂令身樂 安處寶宮殿 卧於瑠璃牀

天王金華手	捧持牀四足	諸天於空中
執持寶蓋侍	承威神讚歎	勸發成佛道
諸龍王歡喜	渴仰殊勝法	曾奉過去佛
今得值菩薩	散曼陀羅華	專心樂供養
如來出興世	淨居天歡喜	已除愛欲歡
為法而欣悅	眾生沒苦海	令得解脫故
須彌寶山王	堅持此大地	菩薩出興世
功德風所飄	普皆大震動	如風鼓浪舟
栴檀細末香	眾寶蓮華藏	風吹騰空流
繽紛而亂墜	天衣從空下	觸身生妙樂

日月如常度	光耀倍增明	世界諸火光
無薪自燄熾	淨水清涼井	前後自然生
中宮姝女眾	怪歎未曾有	競赴而飲浴
皆起安樂想	無量部多天	樂法悉雲集
於藍毘尼園	遍滿林樹間	奇特眾妙華
非時而敷榮	兇暴眾生類	一時生慈心
世間諸疾病	不療自然除	亂鳴諸禽獸
寂然而無聲	萬川皆停流	濁水悉澄清
空中無雲翳	天鼓自然鳴	一切諸世間
悉得安隱樂	猶如荒難國	忽得賢明主

菩薩所以生	為濟世眾苦	唯彼魔天王
獨憂而不悅	父王見生子	奇特未曾有
素性雖安重	驚駭改常容	自慮交心胷
一喜復一懼	夫人見其子	不由常道生
女人性怯弱	怵惕懷冰炭	不別吉凶相
反更生憂怖	長宿諸母人	互亂祈神明
各請常所事	願令太子安	時彼林中有
知相婆羅門	威儀具多聞	才辯高名稱
見相心歡喜	踴躍未曾有	知王心驚怖
白玉以真實	人生於世間	唯求殊勝子

王今如滿月	應生大歡喜	今生奇特子
必光顯宗族	安心自欣慶	莫生餘疑慮
靈祥集家國	從今轉興盛	所生殊勝子
必為世間救	惟此上士身	金色妙光明
如是殊勝相	必成等正覺	若令樂世間
必作轉輪王	普為大地主	勇猛正法治
王領四天下	統御一切王	猶如世光明
日光為最勝	若處於山林	專心求解脫
成就實智慧	普照於世間	譬若須彌山
諸山中之王	眾寶金為最	眾流海為最

諸星月為最	諸明日為最	如來處世間
兩足中為尊	淨目修且廣	上下瞬長睫
瞪矚紺青色	猶如半月形	此相云何非
平等殊勝因	時王告二生	若如汝所說
如此奇特相	以是因緣故	不應於先王
乃現於我世	婆羅門白王	不應如是說
多聞與智慧	名稱及事業	如是四事者
不應顧先後	物性之所生	各從因緣起
今當說諸譬	王今且諦聽	毘求央耆羅
此二仙人族	經歷久遠世	各生殊勝子

毘利訶鉢低	及與儵迦羅	能造帝王論
不從先族來	薩羅薩仙人	經論久斷絕
而生婆羅娑	續復明經論	現在知見生
不必由先緒	毘耶婆仙人	多造諸經論
末後胤跋彌	廣集偈章句	阿低利仙人
不解醫方論	後生阿低離	善能治百病
二生駒尸仙	不閑外道論	後伽提那王
悉解外道法	甘蔗王始族	不能制海潮
至娑伽羅王	生育千王子	能制大海潮
使不越常限	闍那駒仙人	無師得禪道

凡得名稱者	皆生於自力	或先勝後劣
或先劣後勝	帝王諸神仙	不必承本族
是故諸世間	不應顧先後	大王今如是
應生歡喜心	以心歡喜故	永離於疑惑
王聞仙人說	歡喜增供養	我今生勝子
當紹轉輪位	我年已朽邁	出家修梵行
無令聖王子	捨世遊山林	時近處園中
有苦行仙人	名曰阿私陀	善解於相法
來詣王宮門	王謂梵天應	苦行樂正法
此二相俱現	梵行相具足	時王大歡喜

即請入宮內	恭敬設供養	將入內宮中
唯樂見王子	雖有姝女眾	如在空閑林
安處正法座	如敬尊奉事	如安低牒王
奉事波尸吒	時王白仙人	我今得大利
勞屈大仙人	辱來攝受我	諸有所應為
唯願垂教勅	如是勸請已	仙人歡喜
善哉常勝王	眾德悉皆備	愛樂來求者
惠施崇正法	仁智殊勝族	謙恭善隨順
宿植眾妙因	勝果見於今	汝當聽我說
今者之因緣	我從日道來	聞空中天說

言王生太子	當成正覺道	并見先瑞相
今故來到此	欲觀釋迦王	建立正法幢
王聞仙人說	決定離疑網	命持太子出
以示於仙人	仙人觀太子	足下千輻輪
手足網縵指	眉間白毫峙	馬藏隱密相
容色燄光明	見生未曾相	流淚長歎息
王見仙人泣	念子心戰慄	氣結盈心胷
驚悸不自安	不覺從座起	稽首仙人足
而白仙人言	此子生奇特	容貌極端嚴
天人殆不異	當爲人中上	何故生憂悲

將非短壽子	生我憂悲乎	久渴得甘露
而復反棄乎	將非失財寶	喪家亡國乎
若有勝子存	國嗣有所寄	我死時心悅
安樂生他世	猶如人兩目	一眠而一覺
莫於秋霜華	雖敷而無實	人於親族中
愛深無過子	宜時爲記說	令我得蘇息
仙人知父王	心懷大憂懼	卽告言大王
王今勿恐怖	前已語大王	慎勿自生疑
今相猶如前	不應懷異想	自惟我年暮
不及故悲泣	今我臨終時	此子應世王

為盡生故生	斯人難得遇	當捨聖王位
不著五欲境	精勤修苦行	開覺得真實
常為諸羣生	滅除癡冥障	於世永熾然
智慧日光明	眾生沒苦海	眾病為聚沫
衰老為巨浪	死為海洪濤	乘輕智慧舟
度此眾流難	智慧泝流水	淨戒為傍岸
三昧清涼池	正受眾奇鳥	如此甚深廣
正法之大河	渴愛諸羣生	飲之以蘇息
深著五欲境	眾苦所驅迫	迷生死曠野
莫知所歸趣	菩薩出世間	為通解脫道

世間貪欲火	境界薪熾然	興發大悲雲
法雨雨令滅	癡闇門重扉	貪欲為關鑰
閉塞諸羣生	出要解脫門	金剛智慧鑷
拔恩愛逆毛	愚癡網自纏	窮苦無所依
法王出世間	能解眾生縛	王莫以此子
自生憂悲患	當憂彼眾生	著欲違正法
我今老死壞	遠離聖功德	雖得諸禪定
而不獲其利	於此菩薩所	竟不聞正法
身壞命終後	必生三難天	王及諸眷屬
聞彼仙人說	知其自憂歎	恐怖悉已除

生此奇特子	我心得大安	出家捨世榮
修習仙人道	不紹國嗣位	復令我不悅
爾時彼仙人	向王真實說	必如王所慮
當成正覺道	於王眷屬中	安慰眾心已
自以己神力	騰空而遠逝	爾時白淨王
見子奇特相	又聞阿私陀	決定真實說
於子心敬重	倍護兼常念	大赦於天下
牢獄悉解脫	世人生子法	隨宜取捨事
依諸經方論	一切悉皆為	生子滿十日
安隱心已泰	普祠諸天神	廣施於有道

沙門婆羅門

呪願所告福

親族諸羣臣

及國中貧乏

村城婁女眾

牛馬象錢財

各隨彼所須

一切皆給與

卜擇選良時

遷子還本官

二飯白淨牙

七寶莊嚴輿

雜色諸瓊瑤

明艷極光澤

夫人抱太子

周帀禮天神

然後昇寶輿

婁女眾隨侍

王與諸臣民

一切俱導從

猶如天帝釋

諸天眾圍繞

如摩醯首羅

忽生六面子

設種種眾具

供給及請福

今王生太子

設眾具亦然

毘沙門天王

生那羅鳩婆

一切諸天眾 皆悉大歡喜 王今生太子
迦毘羅衛國 一切諸人民 歡喜亦如是

處官品第二

時白淨王家 以生聖子故 親族名子弟
羣臣悉忠良 象馬寶車輿 國財七寶器
日日轉增勝 隨應而集生 無量諸伏藏
自然從地出 清淨雪山中 兇狂羣白象
不呼自然至 不御自調伏 種種雜色馬
形體極端嚴 朱鬣纖長尾 超騰駿若飛
朝野之所生 應時自然至 純色調善牛

肥壯形端正 平步淳香乳 應時悉雲集

怨憎者心平 中平益淳厚 素篤者親密

亂逆悉消除 微風隨時雨 雷霆不震裂

種植不待時 收實倍豐熟 五穀鮮香美

輕輒易消化 諸有懷孕者 身安體和適

除受四聖種 諸餘世間人 資生各自如

無有他求想 無慢無慳嫉 亦無恚害心

一切諸士女 立同劫初人 天廟諸寺舍

園林井泉池 皆如天上物 應時自然生

無有饑餓者 刀兵疾疫息 國中諸人民

親族相愛敬 法愛相娛樂 不生染汙欲

以義求財物 無有貪利心 為法行惠施

無求反報想 修習四梵行 滅除恚害心

過去摩菟王 生日光太子 舉國蒙吉祥

眾惡一時息 今王生太子 其德亦復爾

眾德義備故 名悉達羅他 時摩耶夫人

見其所生子 端正如天童 眾美悉備足

過喜不自勝 命終生天上 大愛瞿曇彌

見太子天童 德貌世奇特 既生母命終

愛育如其子 子敬亦如母 猶日月火光

從微照漸廣 太子長日新 德貌亦復爾

無價梅檀香 閻浮檀名寶 護身神仙藥

瓔珞莊嚴身 附庸諸鄰國 聞王生太子

奉獻諸珍異 牛羊鹿馬車 寶器莊嚴具

助悅太子心 雖有諸嚴飾 嬰童玩好物

太子性安重 形少而心宿 心棲高勝境

不染於榮華 修學諸術藝 一聞超師匠

父王見聰達 深慮踰世表 廣訪名豪族

風教禮義門 容姿端正女 名耶輸陀羅

應娉太子妃 誘導留其心 太子志高遠

德盛貌清明 猶梵天長子 舍那鳩摩羅

賢妃美容貌 窈窕淑妙姿 瓌艷若天后

同處日夜歡 爲立清淨宮 宏麗極莊嚴

高峙在虛空 猶如秋白雲 溫涼四時適

隨時擇善居 妓女眾圍繞 奏合天樂音

勿憐穢聲色 令生厭世想 如天撻撻婆

自然寶宮殿 樂女奏天音 聲色耀心目

菩薩處高宮 音樂亦如是 父王爲太子

靜居修純德 仁慈正法化 親賢遠惡友

心不染恩愛 於欲起毒想 攝情檢諸根

滅除輕躁意 和顏善聽說 慈教厭眾心

宣化諸外道 斷諸謀逆術 教學濟世方

萬民得安樂 如今我子安 萬民亦如是

事火奉諸神 叉手飲月光 恒水沐浴身

法水澡其心 祈福非存已 唯子及萬民

愛語非無義 義言非不愛 愛言非不實

實言非不愛 以有慚愧故 不能如實說

於愛不愛事 不依貪恚想 志存於寂嘿

平心止諍訟 不以祠天會 勝於斷事福

見多求眾生 豐施過其望 心無戰爭想

以德降怨敵	調一而護七	離七防制五
得三覺了三	知二捨於二	求情得其罪
應死垂仁恕	不加麤惡言	輒言而教勅
矜施以財物	指授資生路	受學神仙道
滅除怨恚心	名德普流聞	世累永消亡
主匠修明德	率土皆承習	如人心安靜
四體諸根從	時白淨太子	賢妃耶輸陀
年並漸長大	孕生羅睺羅	白淨王自念
太子已生子	遺嗣相紹續	正化無終極
太子既生子	愛子與我同	不復慮出家

但當力修善	我今心太安	無異生天樂
猶若劫初時	仙王所住道	受行清淨業
祠祀不害生	熾然修勝業	王勝梵行勝
宗族財寶勝	勇健技藝勝	明顯照世間
如日千光耀	所以爲人王	正爲顯其子
顯子爲宗族	榮族以名聞	名高得生天
生天樂爲已	已樂智慧增	悟道弘正法
先勝多聞所	受行正妙道	唯願令太子
愛子不捨家	一切諸國王	生子年尙小
不令王國土	慮其心放逸	縱情著世樂

不能紹王種 今王生太子 隨心态五欲

唯願樂世榮 不欲令學道 過去菩薩王

其道雖深固 要習世榮樂 生子繼宗嗣

然後入山林 修行寂嘿道

厭患品第三

外有諸園林 流泉清涼池 眾雜華果樹

行列垂玄蔭 異類諸奇鳥 奮飛戲其中

水陸四種華 燄色流妙香 妓女因奏樂

弦歌告太子 太子聞音樂 歎美彼園林

內懷甚踴悅 思樂出遊觀 猶如繫狂象

常慕閑曠野 父王聞太子 樂出彼園遊

即勅諸羣臣 嚴飾備羽儀 平治王正路

并除諸醜穢 老病形殘類 羸劣貧窮苦

無令少樂子 見起厭惡心 莊嚴悉備已

啓請求拜辭 王見太子至 摩頭瞻顏色

悲喜情交結 口許而心留 眾寶軒飾車

結駟駿平流 賢良善術藝 年少美姿容

妙淨鮮華服 同車為執御 街巷散眾華

寶纓蔽路傍 垣樹列道側 寶器以莊嚴

繪蓋諸幢旛 續紛隨風颺 觀者俠長路

側身目運光	瞪矚而不瞬	如並青蓮華
臣民悉扈從	如星隨宿王	異口同聲歎
稱慶世希有	貴賤及貧富	長幼及中年
悉皆恭敬禮	唯願令吉祥	郭邑及田里
聞太子當出	尊卑不待辭	寤寐不相告
六畜不違收	錢財不及斂	門戶不容閉
奔馳走路傍	樓閣堤塘樹	窻牖衢巷間
側身競容目	瞪矚觀無厭	高觀謂投地
步者謂乘虛	意專不自覺	形神若雙飛
虔虔恭形觀	不生放逸心	圓體臚支節

色若蓮華敷	今出處園林	願成聖法仙
太子見修塗	莊嚴從人眾	服乘鮮光澤
欣然心歡悅	國人瞻太子	嚴儀勝羽從
亦如諸王眾	見天太子生	時淨居天王
忽然在道側	變形衰老相	勸生厭離心
太子見老人	驚怪問御者	此是何等人
頭白而背偻	目冥身戰搖	任杖而羸步
為是身卒暴	為受性自爾	御者心躊躇
不敢以實答	淨居加神力	令其表真言
色變氣虛微	多憂少歡樂	喜忘諸根羸

是名衰老相	此本為嬰兒	長養於母乳
及童子嬉遊	端正恣五欲	年逝形枯朽
今為老所壞	太子長歎息	而問御者言
但彼獨衰老	吾等亦當然	御者又答言
尊亦有此分	時移形自變	必至無所疑
少壯無不老	舉世知而求	菩薩久習修
清淨智慧業	廣植諸德本	願果萃於今
聞說衰老苦	戰慄身毛豎	雷電霹靂聲
羣獸怖奔走	菩薩亦如是	震怖長噓息
繫心於老苦	領頭而瞪矚	念此衰老苦

世人何愛樂	老相之所壞	觸類無所擇
雖有壯色力	無一不遷變	目前見證相
如何不厭離	菩薩謂御者	宜速迴車還
念念衰老至	園林何足歡	壽命即風馳
飛輪旋本宮	心存朽暮境	如歸空塚間
觸事不留情	所居無暫安	王聞子不悅
勸令重出遊	即勅諸羣臣	莊嚴復勝前
天復化病人	守命在路傍	身瘦而腹大
呼吸長喘息	手脚攣枯燥	悲泣而呻吟
太子問御者	此復何等人	對曰是病者

四大俱錯亂	羸劣無所堪	轉側恃仰人
太子聞所說	即生哀愍心	問唯此人病
餘亦當復爾	對曰此世間	一切俱亦然
有身必有患	愚癡樂朝歡	太子聞其說
即生大恐怖	身心悉戰動	譬如揚波月
處斯大苦器	云何能自安	嗚呼世間人
愚惑癡闇障	病賊至無期	而生喜樂心
於是迴車還	愁憂念病苦	如人被打害
卷身待杖至	靜息於閑宮	果求反世樂
王復聞子還	勅問何因緣	對曰見病苦

王怖猶失身	深責治路者	心結口不言
復增妓女眾	音樂倍勝前	以此悅視聽
樂俗不厭家	晝夜進聲色	其心未始歡
王自出遊歷	更求勝妙園	揀擇諸姝女
美豔極姿顏	智黠能奉事	容媚能惑人
增修王御道	防制諸不淨	并勅善御者
瞻察擇路行	時彼淨居天	復化為死人
四人共持輦	現於菩薩前	餘人悉不覺
菩薩御者見	問此何等輦	旛華雜莊嚴
從者悉憂感	散髮號哭隨	天神教御者

對曰為死人	諸根壞命斷	心散念識離
神逝形乾燥	挺直如枯木	親戚諸朋友
恩愛素纏綿	今悉不喜見	遠棄空塚間
太子聞死聲	悲痛心交結	問唯此人死
天下亦俱然	對曰普皆爾	夫始必有終
長幼及中年	有身莫不壞	太子心驚怛
身垂車軾前	息殆絕而歎	世人一何誤
公見身磨滅	猶尚放逸生	心非枯木石
曾不慮無常	即勅迴車還	非復遊戲時
命脆死無期	如何縱心遊	御者奉王勅

畏怖不敢旋	正御疾驅馳	徑往之彼園
林流肅清淨	嘉木悉敷榮	靈禽雜奇獸
飛走欣和鳴	光耀悅耳目	猶天難陀園

離欲品第四

太子

太子

太子入園林	眾女來奉迎	並生希遇想
競媚進幽誠	各盡妖姿態	供侍隨所宜
或有執手足	或遍摩其身	或復對言笑
或現憂感容	規以悅太子	令生愛樂心
眾女見太子	光顏狀天身	不假諸飾好
素體踰莊嚴	一切皆瞻仰	謂月天子來

種種設方便 不動菩薩心 更互相顧視

抱愧寂無言 有婆羅門子 名曰優陀夷

謂諸姝女言 汝等悉端正 聰明多技術

色力亦不常 兼解諸世間 隱密隨欲方

容色世希有 狀如玉女形 天見捨妃后

神仙為之傾 如何人王子 不能感其情

今此王太子 持心雖堅固 清淨德純備

不勝女人力 古昔孫陀利 能壞大仙人

令習於愛欲 以足蹈其頂 長苦行瞿曇

亦為天后壞 勝渠仙人子 習欲隨汙流

毘尸婆梵仙 修道十千歲 深著於天后

一日頓破壞 如彼諸美女 力勝諸梵行

況汝等技術 不能感王子 當更勤方便

勿令絕王嗣 女人性雖賤 尊榮隨勝夫

何不盡其術 令彼生染心 爾時姝女眾

慶聞優陀說 增其踴悅心 如鞭策良馬

往到太子前 各進種種術 歌舞或言笑

揚眉露白齒 美目相眇昧 輕衣見素身

妖搖而徐步 詐親漸習近 情欲實其心

兼奉大王言 漫形姝隱陋 忘其慚愧情

太子心堅固 傲然不改容 猶如大龍象

羣象眾圍繞 不能亂其心 處眾若閑居

猶如天帝釋 諸天女圍繞 太子在園林

圍繞亦如是 或為整衣服 或為洗手足

或以香塗身 或以華嚴飾 或為貫瓔珞

或有扶抱身 或為安枕席 或傾身密語

或世俗調戲 或說眾欲事 或作諸欲形

規以動其心 菩薩心清淨 堅固難可轉

聞諸姝女說 不憂亦不喜 倍生厭思惟

歎此為奇怪 始知諸女人 欲心盛如是

不知少壯色 俄頃老死壞 哀哉此大惑

愚癡覆其心 當思老病死 晝夜勤勗勵

鋒劍臨其頸 如何猶嬉笑 見他老病死

不知自觀察 是則泥木人 當有何心慮

如空野雙樹 華葉俱茂盛 一已被斬伐

第二不知怖 此等諸人輩 無心亦如是

爾時優陀夷 來至太子所 見宴默禪思

心無五欲想 卽白太子言 大王先見勅

為子作良友 今當奉誠言 朋友有三種

能除不饒益 成人饒益事 遭難不遺棄

我既名善友 棄捨丈夫儀 言不盡所懷
何名爲三益 今故說真言 以表我丹誠
年在於盛時 容色德充備 不重於女人
斯非勝人體 正使無實心 宜應方便納
當生輒下心 隨順取其意 愛欲增憍慢
無過於女人 且今心雖背 法應方便隨
順女心爲樂 順爲莊嚴具 若人離於順
如樹無華果 何故應隨順 攝受其事故
已得難得境 勿起輕易想 欲爲最第一
天猶不能忘 帝釋尙私通 瞿曇仙人妻

阿伽陀仙人 長夜修苦行 爲以求天后
而遂願不果 婆羅墮仙人 及與月天子
婆羅舍仙人 與迦賓闍羅 如是比眾多
悉爲女人壞 況今自境界 而不能娛樂
宿世植德本 得此妙眾具 世間皆樂著
而心反不珍 爾時王太子 聞友優陀夷
甜辭利口辯 善說世間相 答言優陀夷
感汝誠心說 我今當語汝 且復留心聽
不薄妙境界 亦知世人樂 但見無常相
故生患累心 若此法常存 無老病死苦

我亦應愛樂	終無厭離心	若令諸女色
至竟無衰變	愛欲雖為過	猶可留人情
人有老病死	彼應自不樂	何況於他人
而生染著心	非常五欲境	自身俱亦然
而生愛樂心	此則同禽獸	汝所引諸仙
習著五欲者	彼即可厭患	習欲故磨滅
又稱彼勝王	樂著五欲境	亦復同磨滅
當知彼非勝	善言假方便	隨順習近者
習則真染著	何名為方便	虛誑為隨順
是事我不為	真實隨順者	是則為非法

此心難裁抑	隨事即生著	著則不見過
如何方便隨	虛順而心乖	此理我不見
知是老病死	大苦之積聚	令我墜其中
出此非知識說	嗚呼優陀夷	真為大肝膽
生老病死患	此苦甚可畏	眼見悉朽壤
而猶樂追逐	今我至憊劣	其心亦狹小
思惟老病死	卒至不預期	晝夜忘睡眠
何由習五欲	老病死熾然	決定至無疑
猶不知憂感	真為木石心	太子為優陀
種種巧方便	說欲為深患	不覺至日暮

時諸姝女眾 妓樂莊嚴具 一切悉無用

慚愧還入城 太子見園林 莊嚴悉休廢

妓女盡還歸 其處盡虛寂 倍增非常想

俛仰還本宮 父王聞太子 心絕於五欲

極生大憂苦 如利刺貫心 卽召諸羣臣

問欲設方便 咸言非五欲 所能留其心

出城品第五

王復增種種 勝妙五欲具 晝夜以娛樂

冀悅太子心 太子深厭離 了無愛樂情

但思生死苦 如被箭師子 王使諸大臣

貴族名子弟 年少勝姿顏 聰慧執禮儀

晝夜同遊止 以取太子心 如是未幾時

啓王復出遊 服乘駿足馬 眾寶具莊嚴

與諸貴族子 圍繞俱出城 譬如四種華

日照悉開敷 太子耀神景 羽從悉蒙光

出城遊園林 修路廣而平 樹木華果茂

心樂遂忘歸 路傍見耕人 墾壤殺諸蟲

其心生悲惻 痛踰刺貫心 又見彼農夫

勤苦形枯悴 蓬髮而流汗 塵土全其身

耕牛亦疲困 吐舌而急喘 太子性慈悲

極生憐愍心 慨然興長歎 降身委地坐

觀察此眾苦 思惟生滅法 嗚呼諸世間

愚癡莫能覺 安慰諸人眾 各令隨處坐

自陰閻浮樹 端坐正思惟 觀察諸生死

起滅無常變 心定安不動 五欲廓雲消

有覺亦有觀 入初無漏禪 離欲生喜樂

正受三摩提 世間甚辛苦 老病死所壞

終身受大苦 而不自覺知 厭他老病死

此則為大患 我今求勝法 不應同世間

自嬰老病死 而反惡他人 如是真實觀

少壯色力壽 新新不暫停 終歸磨滅法

不喜亦不憂 不疑亦不亂 不眠不著欲

不壞不嫌彼 寂靜離諸蓋 慧光轉增明

爾時淨居天 化為比丘形 來詣太子所

太子敬起迎 問言汝何人 答言是沙門

畏厭老病死 出家求解脫 眾生老病死

變壞無暫停 故我求常樂 無滅亦無生

怨親平等心 不務於財色 所安唯山林

空寂無所營 塵想既已息 蕭條倚空閑

精麤無所擇 乞求以支身 即於太子前

輕舉騰虛逝	太子心歡喜	惟念過去佛
建立此威儀	遺像現於今	端坐正思惟
即得正法念	當作何方便	遂心長出家
斂情抑諸根	徐起還入城	眷屬悉隨從
謂止不遠逝	內密興遐念	方便超世表
形雖隨路歸	心實留山林	猶如繫狂象
常念遊曠野	太子時入城	士女俠路迎
老者願為子	少願為夫妻	或願為兄弟
諸親內眷屬	若當從所願	諸集悌望斷
太子心歡喜	忽聞斷集聲	此音我所樂

斯願要當成 深思斷集樂 增長涅槃心

身如金山峯 曠臂如象手 其音若春雷

紺眼譬牛王 無盡法為心 面如滿月光

師子王遊步 徐入於本宮 猶如帝釋子

心敬形亦恭 往詣父王所 稽首問和安

并啓生死畏 哀請求出家 一切諸世間

合會要別離 是故願出家 欲求真解脫

父王聞出家 心即大戰懼 猶如大狂象

動搖小樹枝 前執太子手 流淚而告言

且止此所說 未是依法時 少壯心動搖

行法多生過	奇特五欲境	心尙未厭離
出家修苦行	未能決定心	空閑曠野中
其心未寂滅	汝心雖樂法	未若我是時
汝應領國事	令我先出家	棄父絕宗嗣
此則爲非法	當息出家心	受習世間法
安樂善名聞	然後可出家	太子恭遜辭
復啓於父王	惟爲保四事	當息出家心
保子命常存	無病不厭老	眾具不損滅
奉命停出家	父王告太子	汝勿說此言
如此四事者	誰能保令無	汝求此四願

正爲人所笑	且停出家心	服習於五欲
太子復啓王	四願不可保	應聽子出家
願不爲留難	子在被燒舍	如何不聽出
分析爲常理	孰能不聽求	脫當自摩滅
不如以法離	若不以法離	死至孰能持
父王知子心	決定不可轉	但當盡力留
何須復多言	更增諸姝女	上妙五欲樂
晝夜苦防衛	要不令出家	國中諸羣臣
來詣太子所	廣引諸禮律	勸令順王命
太子見父王	悲感泣流淚	且還本宮中

端坐嘿思惟	宮中諸姝女	新近圍繞侍
伺候瞻顏色	矚目不暫瞬	猶若秋林鹿
端視彼獵師	太子正容貌	猶若真金山
妓女共瞻察	聽教候音顏	敬畏察其心
猶彼林中鹿	漸已至日暮	太子處幽夜
光明甚輝耀	如日照須彌	坐於七寶座
熏以妙梅檀	姝女眾圍繞	奏健捷婆音
如毘沙門子	眾妙天樂聲	太子心所念
第一遠離樂	雖作眾妙音	亦不在其懷
時淨居天子	知太子時至	決定應出家

忽然化來下 厭諸妓女眾 悉皆令睡眠

容儀不斂攝 委縱露醜形 昏睡互低仰

樂器亂縱橫 傍倚或反倒 或復似投淵

瓔珞如曳鎖 衣裳絞縛身 抱琴而偃地

猶若受苦人 黃綠衣流散 如摧迦尼華

縱體倚壁眠 狀若懸角弓 或手攀窗牖

如似絞死尸 嘔呻長欠呿 厭汗涕流涎

蓬頭露醜形 見若顛狂人 華鬢垂覆面

或以面掩地 或舉身戰掉 猶若獨搖鳥

委身更相枕 手足互相加 或顰蹙皺眉

或闔眼開口 種種身散亂 狼藉猶橫屍

時太子端坐 觀察諸姝女 先皆極端嚴

言笑心諂黠 妖豔巧姿媚 而今悉醜穢

女人性如是 云何可親近 沐浴假莊飾

誑惑男子心 我今已覺了 決定出無疑

爾時淨居天 來下為開門 太子時徐起

出諸姝女間 踟躕於內閣 而告車匿言

吾今心渴仰 欲飲甘露泉 鞍馬速牽來

欲至不死鄉 自知心決定 堅固誓莊嚴

姝女本端正 今悉見醜形 門戶先關閉

今已悉自開 觀此諸瑞相 第一義之筌

車匿內思惟 應奉太子教 脫令父王知

復應深罪責 諸天加神力 不覺牽馬來

平乘駿良馬 眾寶鏤乘具 高翠長髦尾

局背短毛耳 鹿腹鵝王頭 額廣圓爪鼻

龍咽臆臆方 具足騏驥相 太子撫馬頸

摩身而告言 父王常乘汝 臨敵輒勝怨

吾今欲相依 遠涉甘露津 戰鬪多眾旅

榮樂多伴遊 商人求珍寶 樂從者亦眾

遭苦良友難 求法必寡朋 堪此二友者

駿足馬馳駛	猶若鳥迅飛	汝常係馬後
感汝深敬勤	餘事不足計	惟取汝真心
心敬形甚勤	此二今始見	人有心至誠
身力無所堪	力堪心不至	汝今二俱備
捐棄世榮祿	進步隨我來	何人不向利
無利親戚離	汝今空隨我	不求現世報
何以育養子	為紹嗣宗族	所以奉敬父
為其育子故	一切皆求利	汝獨背利遊
多言何所解	今當略告汝	汝事我已畢
今且乘馬還	自我長夜來	所求處今得

即脫寶瓔珞	以授於車匿	持是以賜汝
以慰汝憂悲	寶冠頂摩尼	光明照其身
即脫置掌中	如日曜須彌	車匿持此珠
還歸父王所	持珠禮王足	以表我虔心
為我啓請王	願捨愛戀情	為脫生老死
故入苦行林	亦不求生天	非無仰戀心
亦不懷結恨	惟欲捨憂悲	長夜集恩愛
要當有別離	以有常離故	故求解脫因
若得解脫者	永無離親期	為斷愛出家
勿為子生憂	五欲為憂根	應憂著欲者

乃祖諸勝王 志堅固不移 今我襲餘財
惟法捨非宜 夫人命終時 產財悉遺子
子多貪俗利 而我樂法財 若言年少壯
非是遊學時 當知求正法 無時非爲時
無常無定期 死怨常隨逐 是故我今日
決定求法時 如上諸所啓 汝悉爲我宣
惟願令父王 不復顧戀我 若以形毀我
令王割愛心 汝莫惜其言 使王念不絕
車匿奉教勅 悲塞情昏迷 合掌而胡跪
還答太子言 如勅具宣者 恐更增憂悲

憂悲增轉深 如象溺深泥 決定恩愛離
有心孰不哀 金石尙摧破 何況溺哀情
太子長深宮 少樂身細軟 投身刺棘林
苦行安可堪 初命我索馬 我意已不安
天神驅逼我 命我速莊嚴 何意令太子
決定捨深宮 迦毘羅衛人 舉國生悲痛
父王年已老 念子愛亦深 決定捨出家
此則非所應 邪見無父母 此則無復論
瞿曇彌長養 乳哺形枯乾 慈愛難可忘
莫作背恩人 嬰兒功德母 勝族能奉事

得勝而復棄	此則非勝人	耶輸陀勝子
嗣國掌正法	厥年尚幼小	亦不應棄捨
已違捨父王	及宗親眷屬	勿復棄於我
要不離尊足	心懷如湯火	不堪獨還國
今於空野中	棄太子而歸	則同須曼提
棄捨於羅摩	今若獨還宮	白王當何言
合宮同見責	復以何辭答	太子向告我
隨方便形毀	牟尼功德所	云何而虛說
我深慚愧故	舌亦不能言	設使有言者
天下誰復信	若言月光熱	世間有信者

脫有信太子	所行非法行	太子心柔輒
常慈悲一切	深愛而棄捨	此則違宿心
願可思還宮	以慰我愚誠	太子聞車匿
悲切苦諫言	心安轉堅固	而復告之曰
汝今爲我故	而生別離苦	當捨此悲念
且自慰其心	眾生各異趣	乖離理自常
縱令我今日	不捨親族者	死至形神乖
當復云何留	慈母懷妊我	深愛懷抱苦
生已卽命終	竟不蒙子養	存亡各異路
今爲何處求	曠野高顯樹	眾鳥羣聚棲

暮集晨離散	世間離亦然	浮雲起高山
四集於空中	俄爾復離散	人理亦復然
世間本自乖	暫會恩愛纏	如夢中聚散
不應計我親	譬如春生木	漸長柯葉成
秋霜遂零落	同體尙分離	況人暫合會
親戚豈常俱	汝且息憂苦	順我教而歸
歸意猶存我	且歸後更還	迦毘羅衛人
聞我心決定	願遺念我者	汝當宣我言
度生死苦海	然後當來還	情願若不遂
身滅山林間	白馬聞太子	發斯真實言

屈膝而舐足	長息淚流連	輪掌網縵手
順摩白馬頂	汝莫生憂悲	我今懺謝汝
良馬之勤勞	其功今已畢	惡道苦長息
妙果現於今	眾寶莊嚴劍	車匿常執隨
太子拔利劍	如龍曜光明	寶冠籠玄髮
合剃置空中	上昇凝虛境	飄若鸞鳳翔
初利諸天子	執髮還天宮	常欲奉事足
況今得頂髮	盡心加供養	至於正法盡
太子時自念	莊嚴具悉除	惟有素繪衣
猶非出家儀	時淨居天子	知太子心念

化爲獵師像 持弓佩利箭 身被袈裟衣

徑至太子前 太子念此衣 染色清淨服

仙人上妙飾 非獵者所應 卽呼獵師前

輒語而告曰 汝於此衣服 貪愛似不染

以我身上服 與汝相貿易 獵師白太子

非不惜此衣 用媒於羣鹿 誘引而殺之

苟是汝所須 今當與交易 獵者受妙衣

還復於天身 太子及車匿 見生奇特想

此必無事衣 定非世人服 內心大歡喜

於衣倍增敬 卽與車匿別 披著袈裟衣

猶若青絳雲 圍繞日月輪 安詳而諦步

入於仙人窟 車匿目隨矚 身沒不復見

大家捨父王 眷屬并及我 受著袈裟衣

入於苦行林 舉手仰呼天 悶絕而躡地

起抱白馬頸 望絕隨路歸 徘徊數反顧

形往心反馳 或沉思失覓 或俯仰垂身

或倒而復起 悲泣隨路還

入苦行林品第七

太子遣車匿 將入仙人處 端嚴身光曜

普照苦行林 具足一切義 隨義而之彼

如獸王師子	入於羣獸中	俗容悉已捨
惟見道真形	彼諸學仙士	忽見未曾有
凜然心驚喜	合掌端目矚	男女隨執事
卽視不改儀	如天觀帝釋	瞪視目不瞬
諸仙不移足	瞪視亦復然	任重手執作
不釋事而看	如牛在轅輓	形束而心依
俱學神仙者	咸說未曾見	孔雀等眾鳥
亂聲而翔鳴	持鹿戒梵志	隨鹿遊山林
鹿性羸睽暘	見太子端視	隨鹿諸梵志
端視亦復然	甘蔗燈重明	猶如日初光

能感羣乳牛	增出甜香乳	彼諸梵志等
驚喜傳相告	爲八婆藪天	爲二阿濕波
爲第六魔王	爲梵迦夷天	爲日月天子
而來下此耶	要是所應敬	奔競來供養
太子亦謙下	敬辭以問訊	菩薩遍觀察
林中諸梵志	種種修福業	悉求生天樂
問長宿梵志	所行真實道	今我初至此
未知行何法	隨事而請問	願爲我解說
爾時彼二生	以諸修苦行	及苦行果報
次第隨事答	非聚落所出	清淨水生物

或食根莖葉	或復食華果	種種各異道
服食亦不同	或習於鳥生	兩足擒取食
有隨鹿食草	吸風蟒蛇仙	木石舂不食
兩齒齧為痕	或乞食施人	取殘而自食
或常水沐頭	或奉事於火	水居習魚仙
如是等種種	梵志修苦行	壽終得生天
以因苦行故	當得安樂果	兩足尊賢士
聞此諸苦行	不見真實義	內心不欣悅
思惟哀念彼	心口自相告	哀哉大苦行
惟求人天報	輪迴向生死	苦多而樂少

違親捨勝境	決定求天樂	雖免於小苦
終為大苦縛	自枯槁其形	修行諸苦行
而求於受生	增長五欲因	不觀生死故
以苦而求苦	一切眾生類	心常畏於死
精勤求受生	生已會當死	雖復畏於苦
而長沒苦海	此生極疲勞	將生復不息
任苦求現樂	求生天亦勞	求樂心下劣
俱墮於非義	方於極鄙劣	精勤則為勝
未若修智慧	兩捨永無為	苦身是法者
安樂為非法	行法而後樂	因法果非法

身所行起滅	皆由心意力	若離心意者
此身如枯木	是故當調心	心調形自正
食淨為福者	禽獸貧窮子	常食於果藥
斯等應有福	若言善心起	苦行為福因
彼諸安樂行	何不善心起	樂非善心起
善亦非苦因	若彼諸外道	以水為淨者
樂水居眾生	惡業應常淨	善本功德仙
所住止之處	功德仙住故	普世之所重
應尊彼功德	不應重其處	如是廣說法
遂至於日暮	見有事火者	或鑽或吹然

或有酥油灑	或舉聲呪願	如是竟日夜
觀察彼所行	不見真實義	而便欲捨去
時彼諸梵志	悉來請留住	眷仰菩薩德
忼忼勤勸請	汝從非法處	來至正法林
而復欲棄捨	是故勸請留	諸長宿梵志
蓬髮服草衣	追隨菩薩後	願請小留神
菩薩見諸老	隨逐身疲勞	止住一樹下
安慰遣令還	梵志諸長幼	圍繞合掌請
汝忽來到此	園林妙充滿	而今棄捨去
遂成丘曠野	如人愛壽命	不欲捨其身

我等亦如是 惟願小留住 此處諸梵仙
王仙及天仙 皆依於此處 又鄰雪山側
增長人苦行 其處莫過此 眾多諸學士
由此路生天 求福學仙者 皆從此已北
攝受於正法 慧者不遊南 若汝見我等
懈怠不精進 行諸不淨法 而不樂住者
我等悉應去 汝可留止此 此諸梵志等
常求苦行伴 汝爲苦行長 云何相棄捨
若能止住此 奉事如帝釋 亦如天奉事
毘黎訶鉢低 菩薩向梵志 說已心所願

我修正方便 惟欲滅諸有 汝等心質直
行法亦寂默 親念於來賓 我心實愛樂
美說感人懷 聞者皆沐浴 聞汝等所說
增我樂法情 汝等悉歸我 以爲法良朋
而今棄捨汝 其心甚悵然 先違本親屬
今與汝等乖 合會別離苦 其苦等無異
非我心不樂 亦不見他過 但汝等苦行
悉求生天樂 我求滅三有 形背而心乖
汝等所行法 自習先師業 我爲滅諸集
以求無集法 是故於此林 永無久停理

爾時諸梵志 聞菩薩所說 真實有義言

辭辯理高勝 其心大歡喜 深加崇敬情

時有一梵志 常卧塵土中 縈髮衣樹皮

黃眼修高鼻 而白菩薩言 志固智慧明

決定了生過 知離生則安 不著生天福

志求永滅身 是則未曾有 惟見此一人

祠祀祈天神 及種種苦行 悉求生天樂

未離貪欲境 能與貪欲爭 志求真解脫

此則為丈夫 決定正覺士 斯處不足留

當至頻陀山 彼有大牟尼 名曰阿羅藍

惟彼得究竟 第一增勝眼 汝當往詣彼

得聞真實道 能使心悅者 必當行其法

我觀汝志樂 恐亦非所安 當復捨彼遊

更求餘多聞 隆鼻廣長目 丹脣素利齒

薄膚面光澤 朱舌長軟薄 如是眾妙相

悉飲爾啖水 當度不測深 世間無有比

耆舊諸仙人 不得者當得 菩薩領其言

與諸仙人別 彼諸仙人眾 右繞各辭還

合宮憂悲品第八

車匿牽馬還 望絕心悲塞 隨路號泣行

不能自開割 先與太子俱 一宿之徑路
今捨太子還 生奪天蔭故 徘徊心願戀
八日乃至城 良馬素奔駿 奮迅有威相
躑躅顧瞻仰 不覩太子形 流淚四體垂
顛頽失光澤 旋轉慟悲鳴 日夜忘水草
遺失救世主 還迎毘羅衛 國土悉廓然
如歸空聚落 如日翳須彌 重冥舉世闇
泉池不澄清 華果不榮茂 巷路諸士女
憂感失歡容 車匿與白馬 悵快行不前
問事不能答 遲遲若屍行 眾見車匿還

不見釋王子 舉聲大號泣 如棄羅摩還
有人來路傍 傾身問車匿 王子世所愛
舉國人之命 汝輒盜將去 今爲何所在
車匿抑悲心 而答眾人言 我眷戀追逐
不捨於王子 王子捨於我 并棄俗威儀
剃頭被法服 入於苦行林 眾人聞出家
驚起奇特想 嗚咽而啼泣 涕淚交流下
各各相告語 我等作何計 眾人咸議言
悉當追隨去 如人命根壞 身死形神離
王子是我命 失命我豈生 此邑成丘林

彼林成郭邑 此城失威德 如殺毘黎多

城內諸士女 虛傳王子還 奔馳出路首

惟見馬空歸 莫知其存亡 悲泣種種聲

車匿步牽馬 歔歔垂淚還 失太子憂悲

加增怖懼心 如戰士破敵 執怨送王前

入門淚雨下 滿目無所見 仰天大號哭

白馬亦悲鳴 宮中雜鳥獸 內廐中羣馬

聞白馬悲鳴 嗚呼而應之 謂呼太子還

不見而絕聲 後宮諸姝女 聞馬鳥獸鳴

被髮面萎黃 形瘦脣口乾 弊衣不浣濯

垢穢不浴身 莊嚴具悉廢 毀悴不鮮明

舉體無光澤 猶如寅小星 衣裳壞縷縷

狀如被賊形 見車匿白馬 涕泣絕望歸

感結而號咷 猶如新喪親 狂亂而搔擾

猶羣牛失道 大愛瞿曇彌 聞太子不還

束身投於地 四體悉傷壞 猶如狂風摧

金色芭蕉樹 又聞子出家 長歎增悲感

右旋細輓髮 一孔一髮生 黑淨鮮光澤

平住而灑地 何意合天冠 剃著草土中

臚臂師子步 修廣牛王目 身光黃金燄

侍人扶令起	草土以藉身	清淨寶牀卧	常施而無求	華族大丈夫	未香以塗身	生長於深宮	清淨蓮華色	世間何薄福	方臆梵音聲
為拭其目淚	念子心悲痛	奏樂以覺愔	云何忽一朝	標挺勝多聞	今則冒風露	温衣細軟服	土石刺棘林	失斯聖地主	持是上妙相
其餘諸夫人	悶絕而躡地	豈能山樹間	乞食以活身	德備名稱高	寒暑安可堪	沐浴以香湯	云何而可蹈	妙細柔輓足	入於苦行林

今此勝王家	不習愚癡友	汝今應大喜	隨欲恣心作	將去而啼還	不眠非善友	我心極惶怖	今為在何所	時耶輸陀羅	憂苦四體垂
一旦悉破壞	假名為良朋	作惡已果成	故使聖王子	反覆不相應	不吉縱强暴	戰慄不自安	人馬三共行	深責於車匿	內感心慘結
此諸貴夫人	內實懷怨結	寧近智慧怨	一去不復歸	愛念自在伴	應笑用啼為	汝是不正人	今惟二來還	共我意中人	不動如畫人

憂頓毀形好 涕泣氣息絕 面淚橫流下
夫主尙在世 依此如雪山 安意如大地
憂悲殆至死 況此窓牖中 悲泣長叫者
生亡其所天 其苦何可堪 告馬汝無義
奪人心所重 猶如闇冥中 惡賊劫珍寶
乘汝戰鬪時 刀矛鋒利箭 一切悉能堪
今有何不忍 一族之殊勝 強奪我心去
汝是弊惡蟲 造諸不正業 今日大嗚呼
聲滿於王宮 先劫我所念 爾時何以痊
若爾時有聲 舉宮悉應覺 爾時若覺者

不生今苦惱 車匿聞苦言 飲氣而息結
拔淚合掌答 願聽我自陳 莫嫌責白馬
亦莫恚於我 我等悉無過 天神之所爲
我極畏王法 天神所驅遣 速牽馬與之
俱去疾如飛 厭氣令無聲 足亦不觸地
城門自然開 虛空自然明 斯皆天神爲
豈是我之力 耶輸陀聞說 心生奇特想
天神之所爲 非是斯等咎 嫌責心稍除
熾然大苦息 躄地稱怨嗟 雙輪鳥分乖
我今失依怙 同法行生離 樂法捨同行

何處更求法	古昔諸先勝	大快見王等
斯皆夫妻俱	學道遊林野	而今捨於我
爲求何等法	梵志祠祀典	夫妻必同行
同行法爲因	終則同受報	汝何獨法慳
棄我而隻遊	或見我嫉惡	更求無嫉者
或當嫌薄我	更求淨天女	以何勝德色
修習於苦行	以我薄命故	夫妻生別離
羅睺羅何故	不蒙於膝下	嗚呼不吉士
貌柔而心剛	勝族盛光榮	怨憎猶宗仰
又子生未孩	而能永棄捨	我亦無心腹

夫棄遊山林	不能自泯沒	此則木石人
言已心迷亂	或哭或狂言	或瞪視沈思
哽咽不自勝	憊憊氣殆盡	卧於塵土中
諸餘姝女眾	見生悲痛心	猶如盛蓮華
風雹摧令萎	父王失太子	晝夜心悲戀
齋戒求天神	願令子速還	發願祈請已
出於天祠門	聞諸啼哭聲	驚怖心迷亂
如天大雷電	羣象亂奔馳	見車匿白馬
廣問知出家	舉身投於地	如崩帝釋幢
諸臣徐扶起	以法勸令安	久而心小醒

而告白馬言 我數乘汝戰 每念汝有功
今者憎惡汝 倍於愛念時 所念功德子
汝輒運令去 擲著山林中 獨自空來歸
汝速持我往 不爾往將還 不爲此二者
我命將不存 更無餘方治 惟待子爲藥
如珊瑚梵志 爲子死殺身 我失行法子
自然令無身 摩竭眾生主 亦常爲子憂
況復我常人 失子能自安 昔古阿闍王
愛子遊山林 感恩而命終 卽時得生天
吾今不能死 長夜住憂苦 合官念吾子

虛渴如餓鬼 如人渴掬水 欲飲而奪之
守渴而命終 必生餓鬼趣 今我至虛渴
得子水復失 及我未命終 速語我子處
賦來勿令我渴死 墮於餓鬼中 我素志力強
難動如大地 失子心躁亂 如昔十車王
王師多聞士 大臣智聰達 二人勸諫王
不緩亦不切 願自寬情念 勿以憂自傷
古昔諸勝王 棄國如散華 子今行學道
何足苦憂悲 當憶阿私記 理數亦應然
天樂轉輪王 蕭然不累情 豈曰世界主

能移金玉心 今當使我等 推求到其所

方便苦諫諍 以表我丹誠 要望降其志

以慰王憂悲 王喜即答言 惟汝等速行

如舍居陀鳥 為子空中旋 我今念太子

便悃心亦然 二人既受命 王與諸眷屬

其心小清涼 氣宣餐飲通 誠言十車王

推求太子品第九 聖成願果中 其家志成慶

王正以憂悲 感切師大臣 如鞭策良馬

馳駛若迅流 身疲不辭勞 徑詣苦行林

捨俗五儀飾 善攝諸情根 入梵志精廬

敬禮彼諸仙 諸仙請就坐 說法安慰之

即白仙人言 意有所諮問 爭稱淨飯王

甘蔗名稱胄 我等為師臣 法教典要事

主如天帝釋 子如闍延多 為度老病死

出家或投此 我等為彼來 惟尊應當知

答言有此人 長臂大人相 擇我等所行

隨順生死法 往詣阿羅藍 以求勝解脫

既得定實已 尊崇王速命 不敢計疲勞

尋路而馳進 見太子處林 悉捨俗儀飾

真體猶光耀 如日出烏雲 國奉天神師

執正法大臣	捨除俗威儀	下乘而步進
猶王婆摩疊	仙人婆私吒	往詣山林中
見王子羅摩	各隨其本儀	恭敬禮問訊
猶如倏迦羅	及與央耆羅	盡心加恭敬
奉事天帝釋	王子亦隨敬	王師及大臣
如帝釋安慰	倏迦央耆羅	即命彼二人
坐於王子前	如富那婆藪	兩星侍月傍
王師及大臣	啓請於王子	如毘利波低
語彼闍延多	父王念太子	如利刺貫心
荒迷發狂亂	卧於塵土中	日夜增悲思

流淚常如雨	勅我有所命	惟願留心聽
知汝樂法情	決定無所疑	非時入林藪
悲戀燒我心	汝若念法者	應當哀愍我
望寬遠遊情	以慰我懸心	勿令憂悲水
崩壞我心岸	如雲水草山	風日火雹災
憂悲爲四患	飄乾燒壞心	且還食土邑
時至更遊仙	不顧於親戚	父母亦棄捐
此豈名慈悲	覆護一切耶	法不必山林
在家亦修閑	覺悟勤方便	是則名出家
剃髮服染衣	自遊山藪間	此則懷畏怖

何足名學仙 願得一抱汝 以水雨其頂

冠汝以天冠 置於傘蓋下 矚目一觀汝

然後我出家 頭留摩先王 阿菟闍阿沙

跋闍羅婆休 毘跋羅安提 毘提阿闍那

那羅濕波羅 如是等諸王 悉皆著天冠

瓔珞以嚴容 手足貫珠環 姝女眾娛樂

不違解脫因 汝今可還家 崇習於二事

心修增上法 為地增上主 垂淚約勅我

令宣如是言 既有此勅旨 汝應奉教還

父王因汝故 沒溺憂悲海 無救無所依

無由自開釋 汝當為船師 度著安隱處

毘森摩王子 二羅彌跋提 聞父勅恭命

汝今亦應然 慈母鞠養恩 盡壽報罔極

如牛失其犢 悲呼忘眠食 汝今應速還

以救其生命 孤鳥離羣哀 龍象獨遊苦

憑依者失蔭 當思為救護 一子猶幼孤

遭苦莫知告 免彼煢煢苦 如人救月蝕

舉國諸士女 別離苦熾然 歎息烟衝天

熏慧眼令闍 惟求見汝水 滅火目開明

菩薩聞父王 切教苦備至 端坐正思惟

隨宜遜順答	我亦知父王	慈念心過厚
畏生老病死	故違罔極恩	誰不重所生
以終別離故	正使生相守	死至莫能留
是故知所重	長辭而出家	聞父王憂悲
增戀切我心	但如夢暫會	倏忽歸無常
汝當決定知	眾生性不同	憂苦之所生
不必子與親	所以生離苦	皆從癡惑生
如人隨路行	中道暫相逢	須臾各分散
乖理本自然	合會暫成親	隨緣理自分
深達親假合	不應生憂悲	此世違親愛

他世更求親	暫親復乖離	處處無非親
常合而常散	散散何足哀	處胎漸漸變
分分死更生	一切時有死	山林何非時
時時受五欲	求財時亦然	一切時死故
除死法無時	欲使我為王	慈愛法難違
如病服非藥	是故我不堪	高低愚癡處
放逸隨愛憎	終身常畏怖	思慮形神疲
順眾心違法	智者所不為	七寶妙宮殿
於中盛火然	天厨百味飯	於中有雜毒
蓮華清涼池	於中多毒蟲	位高為災宅

慧者所不居	古昔先勝王	見居國多愆
楚毒加眾生	厭患而出家	故知王正苦
不如行法安	寧處於山林	食草同禽獸
不堪處深宮	黑虺同其穴	捨王位五欲
任苦遊山林	此則爲隨順	樂法漸增明
今棄閑靜林	還家受五欲	日夜苦法增
此則非所應	名族大丈夫	樂法而出家
永背名稱族	建大丈夫志	毀形被法服
樂法遊山林	今復棄法服	有違慚愧心
天王尙不可	況歸人勝家	已吐貪恚癡

還復服食者	如人反食吐	此苦安可堪
如人舍被燒	方便馳走出	須臾還復入
此豈爲黠夫	見生老死過	厭患而出家
今當還復入	愚癡與彼同	處宮修解脫
則無有是處	解脫寂靜生	王者加楚毒
寂靜廢王威	王正解脫乖	動靜猶水火
二理何得俱	決定修解脫	亦不居王位
若言居王位	兼修解脫者	此則非決定
決定解不然	既非決定心	或出還復入
我今已決定	斷親屬鉤餌	正方便出家

云何還復入	大臣內思惟	太子丈夫志
深識德隨順	所說有因緣	而告太子言
如王子所說	求法法應爾	但今非是時
父王哀暮年	念子增憂悲	雖曰樂解脫
反更為非法	雖樂出無慧	不思深細理
不見因求果	徒捨現法觀	有言有後世
又復有言無	有無既不判	何為捨現樂
若當有後世	應任其所得	若言後世無
無即為解脫	若言有後世	不說解脫因
如地堅火煖	水濕風飄動	後世亦復然

此則性自爾	有說淨不淨	各從自性起
言可方便移	此則愚癡說	諸根行境界
自性皆決定	愛念與不念	自性定亦然
老病死等苦	誰方便使然	謂水能滅火
火令水煎消	自性增相壞	性和成眾生
如人處胎中	手足諸體分	神識自然成
誰有為之者	棘刺誰令利	此則性自然
及種種禽獸	無欲使爾者	諸有生天者
自在天所為	及與造化者	無自力方便
若有所由生	彼亦能令滅	何須自方便

而求於解脫	有言我令生	亦復我令滅
有言無由生	要方便而滅	如人生育子
不負於祖宗	學仙人遺典	奉天大祠祀
此三無所負	則名為解脫	古今之所傳
此三求解脫	若以餘方便	徒勞而無實
汝欲求解脫	惟習上方便	父王憂悲息
解脫道須臾	捨家遊山林	還歸亦非過
昔庵婆利王	久處苦行林	捨徒眾眷屬
還家居王位	國王子羅摩	去國處山林
聞國風俗離	還歸維正化	娑樓婆國王

名曰頭樓摩	父子遊山林	終亦俱還國
婆私皴牟尼	及與安低疊	山林修梵行
久亦歸本國	如是等先勝	正法善名稱
悉還王領國	如燈照世間	是故捨山林
正法化非過	太子聞大臣	愛語饒益說
以常理不亂	無礙而庠序	固志安隱說
而答於大臣	有無等猶豫	二心疑惑增
而作有無說	我不決定取	淨智修苦行
決定我自知	世間猶豫論	展轉相傳習
無有真實義	此則我不安	明人別真偽

信豈由他生	猶如生盲人	以盲人為導
於夜大闇中	當復何所之	於淨不淨法
世間生疑惑	設不見真實	應行清淨道
寧苦行淨法	非樂行不淨	觀彼相承說
無一決定相	真言虛心受	永離諸過患
語過虛偽說	智者所不言	如說羅摩等
捨家修梵行	終歸還本國	服習五欲者
此等為陋行	智者所不依	我今當為汝
略說其要義	日月墜於地	須彌雪山轉
我身終不易	退入於非處	寧投身盛火

不以義不畢	還歸於本國	入五欲熾然
表斯要誓言	徐起而長辭	太子辯鋒燄
猶如盛日光	王師及大臣	言論莫能勝
相謂計已盡	惟當辭退還	深敬歎太子
不敢強逼迫	敬奉王命故	不敢速疾還
徘徊於中路	行邁顧遲遲	選擇黠慧人
審諦機悟士	隱身密伺候	然後捨而還

佛所行讚經卷第二

音釋

駛疎土切 妊汝鳩切 舐神帚切 貿莫候切 睽睽切

疾也 孕也 舌取物也 交易也

睽失再切賜弋赤蘇后春書容切齧五結切忼

切睽賜急視也躑躅直炙切躑直錄戲戲音虛戲音

貪也躑躅切躑躅行不進貌戲戲音虛戲音

氣咽而廐居而切縵縵音甘切縵力主切呢尼

也切近技武粉切煖陟劣切煖煖悁悁於緣切悁悁熒熒渠營

也也虺許偉切虺仍吏切

不不

不不

不不

佛所行讚經卷第三

馬馬鳴鳴菩菩薩薩撰

北涼天竺三藏曇無讖譯

餅沙王詣太子品第十

太子辭王師及正法大臣冒浪濟恒河

路由靈鷲嶽藏根於五山特秀峙中亭

林木華果茂流泉温涼分入彼五嶽城

寂靜猶天外國人見太子容德深且明

少年身光澤無比丈夫形悉起奇特想

如見自在幢橫行爲停足隨後咸速馳

先進悉迴顧	矚目觀無厭	四體諸相好
隨見目不移	恭敬來奉迎	合掌禮問訊
咸皆大歡喜	隨宜而供養	仰瞻尊勝顏
俯愧種種形	並素輕躁儀	寂默如肅恭
結恨心求解	慈和情頓增	士女公私業
一時悉休廢	敬形宗其德	隨觀盡忘歸
眉間白毫相	修廣紺青目	舉體金光曜
清淨網縵手	雖為出家形	有應聖王相
王舍城士女	長幼悉不安	此人尚出家
我等何俗歡	爾時餅沙王	處於高觀上

見彼諸士女	惶惶異常儀	勅召一外人
備問何因緣	恭跪王樓下	具白所見聞
昔聞釋氏種	奇特殊勝子	神慧超世表
應王領八方	今出家在此	眾人悉奉迎
王聞心驚喜	形留神已馳	勅使者速還
伺候進趨宜	奉教密隨從	瞻察所施為
瞪靜端目視	佯步顯真儀	入里行乞食
為諸乞士先	斂形心不亂	好惡靡不安
精麤隨所得	持鉢歸閑林	食訖漱清流
樂靜安白山	青林列高崖	丹華植其間

孔雀等諸鳥 翻飛而亂鳴 法服明鮮發

如日照搏桑 使見安住彼 次第具上聞

王聞心馳敬 即勅嚴駕行 天冠佩華服

師子王遊步 簡擇諸宿重 安靜審諦士

導從百千眾 雲騰昇白山 見菩薩威儀

寂靜諸情根 端坐山巖室 如月麗青天

妙色淨端嚴 猶若法化身 虔心肅然發

恭步漸親近 猶如天帝釋 詣摩醯須摩

斂容執禮儀 敬問彼和安 菩薩詳而動

隨順反相酬 時王勞問畢 端坐清淨石

瞪矚瞻神儀 顏和情交悅 伏聞名高族

盛德相承襲 欽情久蘊積 今欲決所疑

日光之源宗 祚隆已萬世 令德紹遺嗣

弘廣萃於今 賢明年幼少 何故而出家

超世聖王子 乞食不存榮 妙體應塗香

何為服袈裟 手宜握天下 反以受薄餐

若不代父王 受禪享其土 吾今分半國

庶望少留情 既勉逼親嫌 時過隨所從

當體我誠言 貪得為良鄰 或恃名勝族

才德容貌兼 不欲降高節 屈下受人恩

當給勇健士	器仗隨軍資	自力廣收羅
天下孰不推	明人知時取	法財五欲增
若不獲三利	終始徒勞勤	崇法捨財色
財為一世人	富財捨法欲	此則保財濱
貧窶而忘法	五欲孰能歡	是故三事俱
德流而道宣	法財五欲備	名世大丈夫
無合圓相身	徒勞而無功	曼陀轉輪王
王頌四天下	帝釋分半座	力不能王天
今汝臚長臂	足攬人天境	我不恃王力
而欲強相留	見汝改形好	受著出家衣

既以敬其德	矜苦惜其人	汝今行乞食
我願奉其土	少壯受五欲	中年習用財
年耆諸根熟	是乃順法時	壯年守法財
必為欲所壞	老則氣虛微	隨順求寂默
耆年愧財欲	行法舉世宗	壯年心輕躁
馳騁五欲境	傳侶契纏綿	情交相感深
年宿寡綢繆	順法者所宗	五欲悉休廢
增長樂法心	且崇王者法	大會奉天神
當乘神龍背	受樂上昇天	先勝諸聖王
嚴身寶瓔珞	祠祀設大會	終歸受天福

如是餅沙王 種種方便說 太子志堅固
不動如須彌 受樂正長天 天賦前聖聖

答餅沙王品第十一

且蒙王管攝

大有奉天輻

餅沙王隨順 安慰勸請已 太子敬答謝

深感於來言 善得世間宜 所說不乖理

訶黎名族胄 為人善知識 義懷心虛盡

法應如是說 世間諸凡品 不能處仁義

薄德愚近情 豈達名勝事 承習先勝宗

崇禮修敬讓 能於苦難中 周濟不相棄

是則為世間 真善知識相 善友財通濟

是名牢固藏 守惜封己利 是必速忘失

國財非常寶 惠施為福業 兼施善知識

雖散後無悔 既知汝厚懷 不為違逆論

且今以所見 率心而相告 畏生老病死

欲求真解脫 捨親離恩愛 豈還習五欲

不畏盛毒蛇 凍雹猛盛火 惟畏五欲境

流轉勞我心 五欲非常賊 劫人善珍寶

詐偽虛非實 猶若幻化人 暫思令人惑

況常處其中 五欲為大礙 永障寂滅法

天樂尚不可 況處人間欲 五欲生渴愛

終無滿足時	猶盛風猛火	投薪亦無足
世間諸非義	莫過五欲境	眾生愚貪故
樂著而不覺	智者畏五欲	不墮於非義
王領四海內	猶外更希求	愛欲如大海
終無止足時	曼陀轉輪王	普天雨黃金
王領四天下	復希忉利天	帝釋分半座
欲啣致命終	農沙修苦行	王三十三天
縱欲心高慢	仙人挽步車	緣斯放逸行
卽墮蟒蛇中	湮羅轉輪王	遊於忉利天
取天女爲后	稅斂仙人金	仙人忿加呪

國滅而命終	婆羅天帝釋	天帝釋農沙
農沙歸帝釋	天主豈有常	國土非堅固
惟大力所居	被服於草衣	食果飲流水
長髮如垂地	寂默無所求	如是修苦行
終爲欲所壞	當知五欲境	行道者怨家
千臂大力王	勇健難爲敵	羅摩仙人殺
亦由貪欲故	況我利利種	不爲欲所牽
少味境界欲	子息長彌增	慧者之所惡
欲毒誰服食	種種苦求利	悉爲貪所使
若無貪欲者	勤苦則不生	慧者見苦過

滅除於貪欲	世間謂為善	即皆是惡法
眾生所貪樂	生諸放逸故	放逸反自傷
死當墮惡趣	勤方便所得	而方便守護
不勤自忘失	非方便能留	猶若假借物
智者不貪著	貪欲勤苦求	得已增愛著
非常離散時	益復增苦惱	執炬還自燒
智者所不著	愚癡卑賤人	慳貪毒燒心
終身長受苦	未曾得安樂	貪恚如蛇毒
智者何由近	勤苦齧枯骨	無味不充飽
徒自困牙齒	智者所不當	王賊水火分

惡子等共財 亦如臭段肉 一聚羣鳥爭

貪財亦如是 智者所不欣 有財所集處

多起於怨憎 晝夜自守護 如人畏重怨

東市殺標下 人情所憎惡 貪恚癡長標

智者常遠離 入山林河海 多敗而少安

如樹高條果 貪取多什死 貪欲境如是

雖見難可取 苦方便求財 難集而易散

猶如夢所得 智者豈保持 如偽覆火坑

蹈者必燒死 貪欲火如是 智者所不遊

如彼鳩羅步 彌瑟膩難陀 彌郝黎檀茶

如屠家刀机	愛欲形亦然	智者所不為
束身投水火	或投於高巖	而求於天樂
徒苦不獲利	孫陶鉢孫陶	阿須倫兄弟
同生相愛念	為欲相殘害	身死名俱滅
皆由貪欲故	貪欲令人賤	鞭杖驅策苦
愛欲卑希望	長夜形神疲	麋鹿貪聲死
飛鳥隨色貪	淵魚貪鈎餌	悉為欲所困
觀察資生具	非為自在法	食以療饑患
除渴故飲水	衣被御風寒	卧以治睡眠
行疲故求乘	立倦求牀座	除垢故沐浴

皆為息苦故	是故應當知	五欲非自在
如人得熱病	求請冷治藥	貪求止苦患
愚夫謂自在	而彼資生具	亦非定止苦
又令苦法增	故非自在法	温衣非常樂
時過亦生苦	月光夏則涼	冬則增寒苦
乃至世八法	悉非決定相	苦樂相不定
奴王豈有聞	教令眾奉用	以王為勝者
教令即是苦	猶擔能任重	普銓世輕重
眾苦集其身	為王多怨憎	雖親或成患
無親而獨立	此復有何歡	雖王四天下

用皆不過一	營救於萬事	唐苦何益身
未若止貪求	息事為大安	居王五欲樂
不王閑寂歡	歡樂既同等	何用王位為
汝勿作方便	導我於五欲	我情之所願
清涼虛通道	汝欲相饒益	助成我所求
我不畏怨家	不求生天樂	心不懷俗利
而捨於天冠	是故違汝情	不獲從來旨
如免毒蛇口	豈復還執持	執炬而自燒
何能不速捨	有目羨盲人	已解復求縛
富者願貧窮	智者習愚癡	世有如此人

則我應樂國	欲度生老死	節身行乞食
寡欲守空閑	後世免惡道	是則二世安
汝今勿哀我	當哀為王者	其心常虛渴
今世不獲安	後世受苦報	汝以名勝族
大丈夫禮儀	厚懷處於我	樂同世歡娛
我亦應報德	勸汝同我利	若習三品樂
是名世丈夫	此亦為非義	常求無足故
若無生老死	乃名大丈夫	汝言少輕躁
老則應出家	我見年老者	力劣無所堪
不如盛壯時	志猛心決定	死賊執劍隨

常伺求其便 豈聽至年老 遂志而出家
無常爲獵師 老弓病利箭 於生死曠野
常伺眾生鹿 得便斷其命 孰聽終年壽
夫人之所爲 若生若滅事 少長及中年
悉應勤方便 祠祀修大會 是皆愚癡故
應當崇正法 反殺以祠天 害生而求福
此則無慈人 害生果有常 猶尙不應殺
況復求無常 而害生祠祀 若無戒聞慧
修禪寂靜者 不應從世間 祠祀設大會
殺生得現樂 慧者不應殺 況復殺眾生

而求後世福 三界有爲果 悉非我所樂
諸趣流動法 如風水飄草 是故我遠來
爲求真解脫 聞有阿羅藍 善說解脫道
今當往詣彼 大仙牟尼所 誠言苦抑斷
我今悔謝汝 願汝國安隱 善護如帝釋
慧明照天下 猶如盛日光 殊勝大地主
端心護其命 正化護其子 以法王天下
冰雪火爲怨 緣火烟幢起 烟幢成浮雲
浮雲興大雨 有鳥於空中 飲雨不雨身
殺重怨爲宅 居宅重怨殺 有殺重怨者



汝今應伏彼	令其得解脫	如飲不雨身
時王即叉手	敬德心歡喜	如汝之所求
願令果速成	汝速成果已	當還攝受我
菩薩心內許	要令隨汝願	交辭而隨路
往詣阿羅藍	王與諸眷屬	合掌自隨送
咸起奇特想	而還王舍城	
見阿羅藍鬱頭藍品第十二		
甘蔗日光胄	到彼寂靜林	敬詣於牟尼
大仙阿羅藍	迦藍玄族子	遠見菩薩來
高聲遙讚歎	安慰言善來	合掌交恭敬

互相問安否	相勞問畢已	詳序而就坐
梵志見太子	容貌審諦儀	沐浴伏其德
如渴飲甘露	舉手告太子	知汝久出家
斷親愛纏鎖	猶如象脫羈	深智覺慧明
能免斯毒果	古昔明勝王	捨位付其子
如人佩華鬘	朽故而棄捨	未若汝盛年
不愛聖王位	觀汝深固志	堪為正法器
當乘智慧舟	超度生死海	凡人誘來學
審才而後教	我今已知汝	堅固決定志
但當任意學	終無隱於子	太子聞其教

歡喜而報言	汝以平等心	善誨無愛憎
但當虛心受	所願便已獲	夜行得炬火
迷方者蒙導	度海得輕舟	我今亦如是
今已蒙哀許	敢問心所疑	生老病死患
云何而可免	爾時阿羅藍	聞太子所問
自以諸經論	略為其解說	汝是機悟士
聰中之第一	今當聽我說	生死起滅義
性變生老死	此五為眾生	性者為純淨
轉變者五大	我覺及與見	隨境根名變
色聲香味觸	是等名境界	手足語二道

是名五業根	眼耳鼻舌身	是名為覺根
意根兼二義	亦業亦名覺	性轉變為因
知因者為我	迦毗羅仙人	及弟子眷屬
於此我要義	修學得解脫	彼迦毗羅者
今波闍波提	覺知生老死	是說名為見
與上相違者	說名為不見	愚癡業愛欲
是說為輪轉	若住此三種	是眾生不離
不信我疑濫	不別無方便	境界深計著
纏綿於我所	不信顛倒轉	異作亦異解
我說我知覺	我去來住覺	如是等計我

是名我作轉	於諸性猶豫	是非不得實
如是不決定	是說名為疑	若說法是我
說彼即是意	亦說覺與業	說數復說我
如是不分別	是說名總濫	愚黠性變等
不了名不別	禮拜誦諸典	殺生祠天祀
水火等為淨	而作解脫想	如是種種見
是名無方便	愚癡所計著	意言語覺業
及境界計者	是說名為著	諸物悉我所
是名為攝受	如此八種惑	彌綸於生死
諸世間愚夫	攝受於五節	闇癡與大癡

瞋恚與恐怖	嬾惰名為闇	生死名為癡
愛欲名大癡	大人生惑故	懷恨名瞋恚
心懼名恐怖	此愚癡凡夫	計著於五欲
生死大苦本	輪轉五道生	轉生我聞
我知我所作	緣斯計我故	隨順生死流
此因非性者	果亦非有性	謂彼正思惟
四法向解脫	黠慧與愚闇	顯現不顯現
若知此四法	能離生老死	生老死既盡
逮得無盡處	世間婆羅門	皆悉依此義
修行於梵行	亦為人廣說	太子聞斯說

復問阿羅藍	云何為方便	究竟至何所
行何等梵行	復應齊幾時	何故修梵行
法應至何所	如是諸要義	為我具足說
時彼阿羅藍	如其經論說	自以慧方便
更為略分別	初離俗出家	依倚於乞食
廣集諸威儀	奉持於正戒	少欲知止足
精麤任所得	樂獨修閑居	勤習諸經論
見貪欲怖畏	及離欲清淨	攝諸根聚落
安心於靜默	離欲惡不善	欲界諸煩惱
遠離生喜樂	得初覺觀禪	既得初禪樂

及與覺觀心	而生奇特想	愚癡心樂著
心依遠離樂	命終生梵天	慧者能自知
方便出覺觀	精勤求上進	第二禪相應
味著彼喜樂	得生光音天	方便離喜樂
增修第三禪	安樂不求勝	生於徧淨天
捨彼意樂者	逮得第四禪	苦樂已俱息
或生解脫想	住彼四禪報	得生廣果天
以彼久壽故	名之為廣果	於彼禪定起
見有身為過	增進修智慧	厭離第四禪
決定增進求	方便除色欲	始自身諸竅

漸次修虛解	終則堅固分	悉成於空觀
略空觀境界	進觀無量識	善於內寂靜
離我及我所	觀察無所有	是無所有處
文閣皮骨離	野鳥離樊籠	遠離於境界
解脫亦復然	是上婆羅門	離形常不盡
慧者應當知	是為真解脫	汝所問方便
及求解脫者	如我上所說	深信者當學
持祇沙仙人	及與闍那伽	毗陀波羅沙
及餘求道者	悉從於此道	而得真解脫
太子聞彼說	思惟其義趣	發其先宿緣

而復重請問	聞汝勝智慧	微妙深細義
於知因不捨	則非究竟道	性轉變知因
說言解脫者	我觀是生法	亦為種子法
汝謂我清淨	則是真解脫	若遇因緣會
則應還復縛	猶如彼種子	時地水火風
離散生理乖	遇緣種復生	無知業因愛
捨則名脫者	存我諸眾生	無畢竟解脫
處處捨三種	而復得三勝	以我常有故
彼則微細隨	微細過隨故	心則離方便
壽命得長久	汝謂真解脫	汝言離我所

離者則無有	眾數既不離	云何離求那
是故有求那	當知非解脫	求尼與求那
義異而體一	若言相離者	終無有是處
色煖離於火	別火不可得	譬如身之前
則無有身者	如是求那前	亦無有求尼
是故先解脫	然後為身縛	又知因離身
或知或無知	若言有知者	則應有所知
若有所知者	則非為解脫	若言無知者
我則無所用	離我而有知	我即同木石
且知其精麤	背麤而崇微	若能一切捨

所作則畢竟	於阿羅藍說	不能悅其心
知非一切智	應行更求勝	往詣鬱陀仙
彼亦計有我	雖觀細微境	見想不想過
離想非想住	更無有出塗	以眾生至彼
必當還退轉	菩薩求出故	復捨鬱陀仙
更求勝妙道	進登伽闍山	城名苦行林
五比丘先住	見彼五比丘	善攝諸情根
持戒修苦行	居彼苦行林	居連禪河側
寂靜甚可樂	菩薩即於彼	一處靜思惟
五比丘知彼	精心求解脫	盡心加供養

如敬自在天 謙卑而師事 進止常不離

猶如修行者 諸根隨心轉 菩薩勤方便

當度老病死 專心修苦行 節身而忘餐

淨心守齋戒 行人所不堪 寂默而禪思

遂經歷六年 日食一麻米 形體極銷羸

欲求度生死 重惑愈更沉 道由慧解成

不食非其因 四體雖微劣 慧心轉增明

神虛體輕微 名德普流聞 猶如月初生

鳩摩頭華敷 溢國勝名流 士女競來觀

苦形如枯木 垂滿於六年 怖畏生死苦

專求正覺因 自惟非由此 離欲寂觀生

未若我先時 於閻浮樹下 所得未曾有

當知彼是道 道非疲身得 要須身力求

飲食充諸根 根悅令心安 心安順寂靜

靜為禪定筌 由禪知正法 法力得難得

寂靜離老死 第一離諸垢 如是等妙法

悉從飲食生 思惟斯義已 澡浴尼連濱

浴已欲出池 羸劣莫能起 天神按樹枝

舉手攀而出 時彼出林側 有一牧牛長

長女名難陀 淨居天來告 菩薩在林中

汝應往供養	難陀婆羅闍	歡喜到其所
手貫白珂釧	身服青染衣	青白相映發
如水淨泡鬘	信心增踴躍	稽首菩薩足
敬奉香乳糜	惟垂哀愍受	菩薩受而食
彼得現法果	食已諸根悅	堪受於菩提
身體蒙光澤	德問轉崇高	如百川增海
初月日增明	五比丘見已	驚起嫌怪想
謂其道心退	捨而擇善居	如人得解脫
五大悉遠離	菩薩獨遊行	詣彼吉祥樹
當於彼樹下	成等正覺道	其地廣平正

柔澤輦草生	安詳師子步	步步地震動
地動感黑龍	歡喜目開明	言會見先佛
地動相如今	牟尼德尊重	大地所不勝
步步足履地	轟轟震動聲	妙光照天下
猶若朝日明	五百羣青雀	右遶空中旋
柔輦清涼風	隨順而迴轉	如斯諸瑞相
悉同過去佛	以是知菩薩	當成正覺道
從彼穫草人	得淨柔輦草	布草於樹下
正身而安坐	跏趺不傾動	如龍絞縛身
要不起斯座	究竟其所作	發斯真誓言

如來

天龍悉歡喜 清涼微風起 草木不鳴條

一切諸禽獸 寂靜悉無聲 斯皆是菩薩

必成覺道相

破魔品第十三

仙王族大仙 於菩提樹下 建立堅固誓

要成解脫道 鬼龍諸天眾 悉皆大歡喜

法怨魔天王 獨憂而不悅 五欲自在王

具諸戰鬪藝 憎嫉解脫者 故名爲波旬

魔王有三女 美貌善儀容 種種惑人術

天女中第一 第一名欲染 次名能悅人

三名可愛樂 三女俱時進 白父波旬言

不審何憂感 父具以其事 寫情告諸女

世有大牟尼 身被大誓鎧 執持大強弓

智慧剛利箭 欲戰伏眾生 破壞我境界

我一旦不如 眾生信於彼 悉歸解脫道

我土則空虛 譬如人犯戒 其身則空虛

及慧眼未開 我國猶得安 當往壞其志

斷截其橋梁 執弓持五箭 男女眷屬俱

詣彼吉安林 願眾生不安 見牟尼靜默

欲度三有海 左手執強弓 右手彈利箭

而告菩薩言	汝刹利速起	死甚可怖畏
當修汝自法	捨離解脫法	習戰施福會
調伏諸世間	終得生天樂	此道善名稱
先勝之所行	仙王高宗胄	乞士非所應
今若不起者	且當安汝意	慎莫捨約誓
試我一放箭	湮羅月光孫	亦由我此箭
小觸如風吹	其心發狂亂	寂靜苦行仙
聞我此箭聲	心即大恐怖	昏迷失本性
況汝末世中	望脫我此箭	汝今速起者
幸可得安全	此箭毒猛盛	慄儉而戰掉

計力堪箭者	自安猶尙難	況汝不堪箭
云何能不驚	魔說斯怖事	迫脅於菩薩
菩薩心怡然	不疑亦不怖	魔王即放箭
兼進三玉女	菩薩不視箭	亦不顧三女
魔王惕然疑	心口自相語	曾為雪山女
射摩醯首羅	能令其心變	而不動菩薩
非復以此箭	及天三玉女	所能移其心
令起於愛恚	當更合軍眾	以力强逼迫
作此思惟時	魔軍忽然集	種種各異形
執戟持刀劍	戴樹捉金杵	種種戰鬪具

猪魚驢馬頭	駝牛兕虎形	獅子龍象首
及餘禽獸類	或一身多頭	或面各一目
或復眾多眼	或大腹長身	或羸瘦無腹
或長腳大膝	或大腳肥腩	或長牙利爪
或無頭胷面	或兩足多身	或大面傍面
或作灰土色	或似明星光	或身放烟火
或象耳負山	或被髮裸形	或被服皮革
面色半赤白	或著虎皮衣	或復著蛇皮
或腰帶大鈴	或紫髮螺髻	或散髮被身
或吸人精氣	或奪人生命	或越擲大呼

或奔走相逐	迭自相打害	或空中旋轉
或飛騰樹間	或號呀吼喚	惡聲震天地
如是諸惡類	圍遶菩提樹	或欲擘裂身
或復欲吞噉	四面放火然	烟燄上衝天
狂風四激起	山林普震動	風火烟塵合
黑闇無所見	愛法諸天人	及諸龍鬼神
悉皆忿魔眾	瞋恚血淚流	淨居諸天眾
見魔亂菩薩	離欲無瞋心	哀愍而傷彼
悉來見菩薩	端坐不傾動	無量魔圍遶
惡聲動天地	菩薩安靜默	光顏無異相

猶如師子王	處於羣獸中	皆歎嗚呼呼
奇特未曾有	魔眾相驅策	各進其威力
迭共相催切	須臾令摧滅	裂背加切齒
亂飛而逃擲	菩薩默然觀	如看童兒戲
眾魔益忿恚	倍增戰鬪力	抱石不能舉
舉者不能下	飛矛戟利稍	凝虛而不下
雷震雨大雹	化成五色華	惡龍蛇噴毒
化成香風氣	諸種種形類	欲害菩薩者
不能令傾動	隨事還自傷	魔王有姊妹
名彌伽迦利	手執觸體器	在於菩薩前

作種種異儀	姪惑亂菩薩	如是等魔眾
種種醜類身	作種種惡聲	欲恐怖菩薩
不能動一毛	諸魔悉憂惑	空中負多神
隱身出音聲	我見大牟尼	心無怨恨想
眾魔惡毒心	無怨處生怨	愚癡諸惡魔
徒勞無所為	當捨恚害心	寂靜默然住
汝不能口氣	吹動須彌山	火冷水熾然
地性平柔輒	不能壞菩薩	歷劫修苦行
菩薩正思惟	精進勤方便	淨智慧光明
慈悲於一切	此四妙功德	無能中斷截

而為作留難 不成正覺道 如日千光照

必除世間闇 鑽木而得火 掘地而得水

精勤正方便 無求而不獲 世間無救護

中貪恚癡毒 哀愍眾生故 求智慧良藥

為世除苦患 汝云何惱亂 世間諸癡惑

皆悉著邪徑 菩薩習正路 欲引導眾生

惱亂世導師 是則大不可 如大曠野中

欺誑商人導 眾生墮大冥 莫知所至處

為然智慧燈 云何欲令滅 眾生悉漂沒

生死之大海 為修智慧舟 云何欲令沒

忍辱為法芽 固志為法根 律儀戒為華

覺心為枝幹 智慧之大樹 無上法為果

蔭護諸眾生 云何而欲伐 貪恚癡枷鎖

輓縛於眾生 長劫修苦行 為解眾生縛

決定成於今 於此正基坐 如過去諸佛

堅堅金剛際 諸方悉傾動 惟此地安隱

能堪受妙定 非汝所能壞 但當輒下心

除諸高慢意 應修知識想 忍辱而奉事

魔聞空中聲 見菩薩安靜 慚愧離憍慢

復道還天上 魔眾悉憂戚 崩潰失威武

鬪戰諸器仗 縱橫棄林野 如人殺怨主

怨黨悉摧碎 眾魔既退散 菩薩心虛靜

日光倍增明 塵霧悉除滅 月明眾星朗

無復諸闇障 空中雨天華 以供養菩薩

阿惟三菩提品第十四

菩薩降魔已 志固心安靜 永盡第一義

入於深妙禪 自在諸三昧 次第現在前

初夜入正受 憶念過去生 從某處某名

而來生於此 如是百千萬 死生悉了知

受生死無量 一切眾生類 悉曾為親族

而起大悲心 大悲心念已 又觀彼眾生

輪迴六趣中 生死無窮極 虛偽無堅固

如芭蕉夢幻 即於中夜時 逮得淨天眼

見一切眾生 如觀鏡中像 眾生生生死

貴賤與貧富 清淨不淨業 隨受苦樂報

觀察惡業者 當生惡趣中 修習善業者

生於人天中 若生地獄者 受無量種苦

吞飲於洋銅 鐵槍貫其體 投之沸鑊湯

驅入盛火聚 長牙羣犬食 利嘴鳥啄腦

畏火起叢林 劍葉截其體 利刀解其身

或利斧斫剝	受斯極苦毒	業行不令死
樂修不淨業	極苦受其報	味著須臾頃
苦報甚久長	戲笑種苦因	號泣而受罪
惡業諸眾生	若見自報者	氣脉則應斷
恐怖崩血死	造諸畜生業	業種種各異
死墮畜生道	種種各異身	或為皮肉死
毛角骨尾羽	更互相殘殺	親戚還相噉
負重而挽輓	鞭策鉤錐刺	傷體膿血流
饑渴莫能解	展轉相殘殺	無有自在力
虛空水陸中	逃死亦無處	慳貪增上者

生於餓鬼趣	巨身如大山	咽孔猶針筍
饑渴火毒然	還自燒其身	求者慳不與
或遮人惠施	生彼餓鬼中	求食不能得
不淨人所棄	欲食而變失	若人聞慳貪
苦報如是者	割肉以施人	如彼尸毗王
或生人中道	身處於行廁	動轉極大苦
出胎生恐怖	輒身觸外物	猶如刀劔截
住彼宿業分	無時不有死	勤苦而求生
得生長受苦	乘福生天者	渴愛常燒身
福盡命終時	衰死五相至	猶如樹華萎

枯悴失光澤	眷屬存亡分	悲苦莫能留
宮殿廓然空	玉女悉遠離	坐卧塵土中
悲泣相戀慕	生者哀墮落	死者戀生悲
精勤修苦行	貪求生天樂	既有如是苦
鄙哉何可貪	大方便所得	不免別離苦
嗚呼諸天人	修短無差別	積劫修苦行
永離於愛欲	謂決定長存	而今悉墮落
地獄受眾苦	畜生相殘殺	餓鬼饑渴逼
人間疲渴愛	雖云生天樂	別離最大苦
迷惑生世間	無一蘇息處	嗚呼生死海

輪轉無窮已	眾生沒長流	漂泊無所依
如是淨天眼	觀察於五道	虛偽不堅固
如芭蕉泡沫	即彼第三夜	入於深正受
觀察諸世間	輪轉苦自性	數數生老死
其數無有量	貪欲癡闇障	莫知所由出
正念內思惟	生死何從起	決定知老死
必由生所致	如人有身故	則有身痛隨
又觀生何因	見從諸有業	天眼觀有業
非自在天生	非自性非我	亦復非無因
如破竹初節	餘節則無難	既見生死因

漸次見真實	有業從取生	猶如火得薪
取以愛為因	如小火焚山	知愛從受生
覺苦樂求安	饑渴求飲食	受生愛亦然
諸受觸為因	三等苦樂生	鑽燧加人功
則得火為用	觸從六入生	盲無明覺故
六入名色起	如芽長莖葉	名色由識生
如種芽葉生	識還從名色	展轉更無餘
緣識生名色	緣名色生識	猶人船俱進
水陸更相運	如識生名色	名色生諸根
諸根生於觸	觸復生於受	受生於愛欲

愛欲生於取	取生於業有	有則生於生
生生於老死	輪迴周無窮	眾生因緣起
正覺悉覺知	決定正覺已	生盡老死滅
有滅則生滅	取滅則有滅	愛滅則取滅
受滅則愛滅	觸滅則受滅	六入滅觸滅
一切入滅盡	由於名色滅	識滅名色滅
行滅則識滅	癡滅則行滅	大仙正覺成
如是正覺成	佛則興世間	正見等八道
坦然平直路	畢竟無我所	如薪盡火滅
所作者已作	得先正覺道	究竟第一義

入大仙人室	聞謝明相生	動靜悉寂默
逮得無盡法	一切智明朗	大仙德純厚
地爲普震動	宇宙悉清明	天龍神雲集
空中奏天樂	以供養於法	微風清涼起
天雲雨香雨	妙華非時敷	甘果違節熟
摩訶曼陀羅	種種天寶華	從空而亂下
供養牟尼尊	異類諸眾生	各慈心相向
恐怖悉銷除	無諸恚慢心	一切諸世間
皆同漏盡人	諸天樂解脫	惡道暫安寧
煩惱漸休息	智月漸增明	甘蔗族仙士

有諸生天者	見佛出興世	歡喜充滿身
卽於天宮殿	雨華以供養	諸天龍鬼神
同聲歎佛德	世人見供養	及聞讚歎聲
一切皆隨喜	踴躍不自勝	惟有魔天王
心生大憂悲	佛於彼七日	禪思心清淨
觀察菩提樹	瞪視目不瞬	我依於此處
得遂宿心願	安住無我法	佛眼觀眾生
發上哀愍心	欲令得清淨	貪恚癡邪見
飄流沒其心	解脫甚深妙	何由能得宣
捨離勤方便	安住於默然	願惟本誓願

復生說法心 觀察諸眾生 煩惱孰增微
梵天知其念 法應請而轉 普放梵光明
爲度苦眾生 來見牟尼尊 說法大人相
妙義悉顯現 安住實智中 離於留難過
無諸虛僞心 恭敬心歡喜 合掌勸請言
世間何福慶 遭遇大悲尊 一切眾生類
塵穢滓雜心 或有重煩惱 或煩惱輕微
世尊已免渡 生死大苦海 願當濟渡彼
沉溺諸眾生 如世間義士 得利與物同
世尊得法利 惟應濟眾生 凡人多自利

彼我兼利難 惟願垂慈悲 爲世難中難
如是勸請已 奉辭還梵天 佛以梵天請
心悅加其誠 長養大悲心 增其說法情
念當行乞食 四王咸奉鉢 如來爲法故
受四合成一 時有商人行 善友天神告
大仙牟尼尊 在彼山林中 世間良福田
汝應往供養 聞命大歡喜 奉施於初飯
食已顧思惟 誰應先聞法 惟有阿羅藍
鬱頭羅摩子 彼堪受正法 而今已命終
次有五比丘 應聞初說法 欲說寂滅法

轉法輪品第十五

如日光除冥	行詣波羅奈	古仙人住處
牛王目平視	安詳師子步	爲度眾生故
往詣迦尸城	步步獸王視	顧瞻菩提林
如來善寂靜	光明顯照耀	嚴儀獨遊步
猶若大眾隨	道逢一梵志	其名優波迦
執持比丘儀	恭立於路傍	欣遇未曾有
合掌而啟問	羣生皆染著	而有無著容
世間心動搖	而獨靜諸根	光顏如滿月
似味甘露津	容貌大人相	慧力自在王

所作必已辦	爲宗稟何師	答言我無師
無宗無所勝	自悟甚深法	得人所不得
人之所應覺	舉世無覺者	我今悉自覺
是故名正覺	煩惱如怨家	伏以智慧劍
是故世所稱	名之爲最勝	當詣波羅奈
擊甘露法鼓	無慢不存名	亦不求利樂
惟爲宣正法	拔濟苦眾生	以昔發弘誓
度諸未度者	誓果成於今	當遂其本願
富財自供已	不稱名義士	兼利於天下
乃名大丈夫	臨危不濟溺	豈云勇健士

疾病不救療	何名為良醫	見迷不示路
孰云善導師	如燈照幽冥	無心而自明
如來然慧燈	無諸求欲情	鑽燧必得火
空中風自然	穿地必得水	此皆理自然
一切諸牟尼	成道必伽耶	亦同迦尸國
而轉正法輪	梵志優波迦	嗚呼歎奇特
隨心先所期	從路各分乖	計念未會有
步步顧踟躕	如來漸前行	至於迦尸城
其地勝莊嚴	如天帝釋宮	恒河波羅奈
二水雙流間	林木華果茂	禽獸同羣遊

閑寂無喧俗	古仙之所居	如來光照曜
倍增其鮮明	憍陳如族子	次十方迦葉
三名婆澀波	四阿濕波誓	五名跋陀羅
習苦樂山林	遠見如來至	集坐共議言
瞿曇染世樂	放捨諸苦行	今復還至此
慎勿起奉迎	亦莫禮問訊	供給其所須
已壞本誓故	不應受供養	凡人見來賓
應修先後宜	且為設牀座	任彼之所安
作此要言已	各各正基坐	如來漸欲至
不覺違約言	有請讓其座	有為攝衣鉢

佛身不計雜念三
有請洗摩足 有請問所須 如是等種種
尊敬奉師事 惟不捨其族 猶稱瞿曇名
世尊告彼言 莫稱我本姓 於阿羅訶所
而生媠慢言 於敬不敬者 我心悉平等
汝等心不恭 當自招其罪 佛能度世間
是故稱爲佛 於一切眾生 等心如子想
而稱本名字 如得慢父罪 佛以大悲心
哀愍而告彼 彼率愚騃心 不信正真覺
言先修苦行 猶尙無所得 今恣身口樂
何因得成佛 如是等疑惑 不信得佛道

究竟真實義 一切智具足 如來卽爲彼
略說其要道 愚夫習苦行 樂行悅諸根
見彼二差別 斯則爲大過 非是正真道
以違解脫故 疲身修苦行 其心猶馳亂
尙不生世智 況能超諸根 如以水然燈
終無破闇期 疲身修慧燈 不能壞愚癡
朽木而求火 徒勞而不獲 鑽燧人方便
卽得火爲用 求道非苦行 而得甘露法
著欲爲非義 愚癡障慧明 尙不了經論
況得離欲道 如人得重病 食不隨病食

無知之重病 著欲豈能除 放火於曠野
乾草增猛風 燄盛孰能滅 貪愛火亦然
我已離二邊 心存於中道 眾苦畢竟息
安靜離諸過 正見踰日光 平等覺觀乘
正語爲舍宅 遊戲正叢林 正命爲豐姿
方便爲正路 正念爲城郭 正定爲牀座
八道坦平正 免脫生死苦 從此塗出者
所作已究竟 不墮於彼此 二世苦數中
三界純苦聚 唯此道能滅 本所未曾聞
正法清淨眼 等見解脫道 唯我今始起

生老病死苦 愛離怨憎會 所求事不果
及餘種種苦 離欲未離欲 有身及無身
離淨功德者 略說斯皆苦 猶如盛火息
雖微不捨熱 寂靜微細我 大苦性猶存
貪等諸煩惱 及種種業過 是則爲苦因
捨離則苦滅 猶如諸種子 離於地水等
眾緣不和合 芽葉則不生 有有性相續
從天至惡趣 輪迴而不息 斯由貪欲生
輒中上差降 種種業爲因 若滅於貪等
則無有相續 種種業盡者 差別苦長息

此有則彼有 此滅則彼滅 無生老病死
無地水火風 亦無初中邊 亦非欺誑法
聖賢之所住 無盡之寂滅 所說八正道
是方便非餘 世間所不見 彼彼長迷惑
我知苦斷集 證滅修正道 觀此四真諦
逮成等正覺 謂我已知苦 已斷有漏因
已滅盡作證 已修八正道 已知四真諦
清淨法眼成 於此四真諦 未生平等眼
不名得解脫 不言作已作 亦不言一切
真實知覺成 已知真諦故 自知得解脫

自知作已作 自知等正覺 說是真實時

憍鄰族姓子 八萬諸天眾 究竟真實義

遠離諸塵垢 清淨法眼成 天人師知彼

所作事已作 歡喜師子吼 問憍鄰知未

憍鄰卽白佛 已知大師法 已知彼法故

名阿若憍鄰 於佛弟子中 最先第一悟

彼知正法聲 聞子諸地神 咸共舉聲唱

善哉深見法 如來於今日 轉未曾所轉

普爲諸天人 廣開甘露門 淨戒爲眾輻

調伏寂定齊 堅固智爲輞 慚愧屑其鑄

